

Friday, December 5, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

AGRICULTURE MINISTER

Agriculture Minister Pu PC Vanlalruata'n Mizoram atanga thlai tharchhuah zingah Mizo sawhthing chu an chhuang zual hle tih sawiin, Mizoram sorkar chuan kuminah loneitute hnen atanga sawhthing a leina support price atan cheng cheng vbc 137 chuang a seng tawh a ti.

Wawiina Agriculture & Farmers' Welfare Department buatsaih Aijal Club-a BUYER-SELLER MEET 2025 an hmannaah he thu hi sawiin, Agriculture Minister Pu Vanlalruata chuan nikuma BUYER-SELLER MEET an lo neih tawh chu thlai thar chhuaktu loneitute thawhrimna leh an tharchhuah leisaktute zarah a hlawhtling hle a ti a, kumina BUYER-SELLER MEET an neih leh tur chuan nikum a khum ngei a rin thu a sawi a, Mizorama thar chhuah sawhthing, aieng, Mizo hmarchate leh buhfaite chuan ram chhung hmun hrang hranga sumdawnna lian tak a thleng tawh tih sawiin Mizoram atanga thlai an tharchhuah zingah Mizo sawhthing chu an chhuang zual hle tih a ti a, kumin chhungin Mizoram sorkar chuan loneitute hnen atanga sawhthing a leina support price atan cheng cheng vbc 137 chuang a seng tawh a ti a, tunhnaia New Delhi-a NITI Aayog-in stakeholder inrawnkhawmna a buatsaihah Mizorama sawhthing chingtute tan Mizoram sorkar leh sorkar laipuiin loneitute tan sumdawnna tha tak an siam sak zia a lantir tih a sawi a, sorkar chuan loneitute hlawkna leh hamthatna atan engmah tih hreh a nei dawn lo tih sawiin, Mizoram sorkar chuan marketing system tichak leh zual tur leh minimum support price kalpui zel turin hma an la dawn tih a sawi ni.

Byte: Agri Minister Pu Vanlalruata

Mizoram Agricultural Marketing Board (MAMB)-in International Fund for Agricultural Development, (IFAD) leh Mission Organic Mizoram, (MOM) te thawhpui a an buatsaih BUYER-SELLER MEET 2025 hi vawiin December ni 5 leh naktuk December ni 6 hian Aijal Club-ah neih a ni dawn a, he hunah hian Mizoram hmun hrang hranga loneitute thlai thar leh an kutchhuak te lei theiha phochhuah a ni ang.




CM

Chief Minister Pu Lalduhoma chuan Myanmar buai tirh phat atangin sahimna zawnga Mizorama lut Zofate buaipui an nih thin thu leh theihtawp an la chhuah zel thu a sawi.

Nimina Institute of Chin Affairs (ICA) ten Aijal Club-a "Together for Humanity" Friendship Dinner an buatsaih a hmanpuinaah he thu hi sawiin Chief

Minister chuan khawvel hmun hrang hranga cheng Chin mite din Institute of Chin Affairs (ICA) hnathawh hrang hrangte ropui a tih thu leh Chin mipui zawng zawngte tan malsawmna ni zel tura a duh thu a sawi a.

Chief Minister chuan an harsatna tawh mekte tha taka an hmachhawn theih nan Chin state chhunga zofate inlunguala, zai khata luangza tura a ngen thu a sawi a. An inlungual loh chuan midang tan hneh awlsam tak an ni reng dawn tih sawiin thukhat vuain, inkaihhruaina pakhat hnuaiyah, tum thuhmun neiin awm turin a sawm a. Inthianthatna zanriah an kil ho pawhin chu chu a thiltum a nih thu sawiin tupawhin India sorkar zah takin thil ti zel se a duh thu a sawi bawk a ni.




LESDE MINISTER

Labour, Employment, Skill Development & Entrepreneurship Department
Minister Pu Lalnginglova Hmar chuan Mizo thalai ei ringawt, ei tur zawng ve lo an tam chu pawia tih thu a sawi.

Nimina Synod Multipurpose Training Centre (SMTC) in SMTC Hall, Mission Vengthlanga ‘Graduation Day’ an buatsaih a hmanpuinaah he thu hi sawiin Minister chuan hnathawhah hlawh tlem a zahthlak loh thu leh hlawh neih loh a zahthlak zawk tih sawiin, trade hrang hranga ‘thiamna’ zirchhuak thalaite chu an hna bul tannaah hlawh a sang lo deuh a nih pawhin taima taka an thawh chuan hlawhtlinna a awm tih a sawi a. Minister chuan hnathawk lo thalai an tam laia eizawna kawng dap tura intuai hriam Mizo thalai thahnem tak an awm chu lawmawm a tih thu a sawi a ni.

Kuminah hian SMTC atangin zirlai 109 in an zirchhuak a. Women’s tailoring ah mi 39, Men’s tailoring leh Electric wiring & repairing ah mi 14 ve ve, DCA ah mi 27, Beauty culture ah mi 9 leh Mobile repairing ah mi 6 te an ni.



KVK SIAHA

Vawiin khan Siaha a Krishi Vigyan Kendra, Agriculture Technology Management Agency (ATMA) leh District Agriculture Office tangkawpin KVK Conference Hall ah World Soil Day 2025 hman a ni a, Kumina Soil Day ah hian 'Healthy Soils for Healthy Cities' tih thupui hman niin Lei (soil) chungchang in zirtirna he ni pual hian hman nghal a ni.

Vawiin ah hun hman hi Pu H. Vanlalhmuliana Head Sr Scientist KVK kaihruaina hnuaiyah hman niin, Pi Elizabeth Khaimeichho, Project Director, ATMA, chuan thusawiin tunlai khawvel changkang zel a technology tharte chu hman thiam a pawimawh thu a sawi a. Loneimite tan lei enkawl dan thiam a pawimawh thu sawiin Kalkhawm te chu an thil zir ho ngaipawimawh turin a chah nghal bawk.

Pi Lalrinengi, KVK Senior Researcher chuan lei hrang hrang chungchang leh a enkawl dan zirtirna pe in, Second session ah Soil Testing, Soil Reclamation and Soil Card tih thupui hmang in Farmers Scientist Interaction cum Awareness Programme on Soil Collection and Training of CRPs under NMNF neih nghal niin,

Soil Health Card apps hmandan chu Benjamin B Bohia, CP leh Lalrotluanga Ralte in a zirtir a ni.



PM MODI

Prime Minister Narendra Modi leh India ram tlawh a rawn zin Russia President Vladimir Putin te chuan vawiin hian New Delhi ah ram aiawhin an in be dawn.

Inbiakna ah hian Ram 2 hruaitute hian inlaichinna leh hmasawna chungchang te, sakhuana leh khawvel huap a thawhdunna hrang hrang te an sawi dun dawn a, inremna thuthlung engemawzat an ziah beisei a ni bawk.

Russia President hi tukin ah Rashtrapati Bhawan ah lawmna inkhawm neih a ni a, India Hnam Pa Mahatma Gandhi zahna pangpar a dah dawn bawk.

